

四庫全書

史部

欽定四庫全書

史部

欽定續通典卷一百四十七

詳校官監察御史<sub>臣</sub>曹錫寶

洗馬<sub>臣</sub>王坦修覆勘

校對官編修<sub>臣</sub>甘立猷  
謄錄舉人<sub>臣</sub>唐以增

欽定四庫全書

欽定續通典卷一百四十七

邊防

臣等謹案杜佑作邊防典具列四裔諸國極之萬里之遙重洋之隔皆得以邊防統之者誠以地雖遼遠而綏柔駕馭之道不可不明所謂來則禦之去則備之兢兢以持盈知足為要諒哉其言之已自唐以降各部分併不常背服不一強弱異形通

阻異勢諸史所載事蹟頗繁若唐之突厥吐蕃宋之西夏明之倭人兵事相尋動輒數十百年所關於邊防者固非淺鮮我

聖朝撫御環瀛版圖式廓

皇上德威遠布綏定遐方若杜氏所列之挹婁靺鞨諸部今為黑龍江寧古塔地杜氏所列之烏桓鮮卑諸部今為內扎薩克地杜氏所列之耶都笮都冉駝諸部今為金川境內地杜氏所列之車師龜茲



于闐諸部今為天山南北路地非可復以邊防目  
之而當明以前則固自為風氣非疆宇所能及也  
茲謹就史冊志乘所載國俗土風依四正四隅方  
位類次於篇至於諸國之名有互見於諸史者有  
前史所載而後史即無聞者故杜氏通典以國為  
綱就一國之中其紀事按照時代接叙不另提綱  
今亦依杜氏之例仍以國為綱焉

第一邊防東

正東

朝鮮

滿

耽羅

新羅

長

尼婆羅

東南

雞籠山 琉球 三嶼 呂  
宋 合貓里 沙瑤 叻暉

馮嘉施蘭

暉 古麻刺朗

文郎馬神 美

洛居 佛郎機

和蘭

## 第二邊防南

正南

盤瓠種 西原蠻 南詔 文  
面濮 赤口濮 黑焚濮 驃

緬安南

南掌

暹羅

彭亨

丹眉流

占域 寶童龍

滿刺加

阿魯

爪哇

重迦羅

日羅夏治

磤里

丁機宜

蘇吉

丹柔佛

真臘

投和

婆利

三佛

齊

蘇祿

勃泥

層檀

巴喇西

瞻博

修羅

分

室利佛逝

名筏

單單

注輦

馬八

兒諸

西南

渝州蠻

兩巽

東謝

牂牁

充

國

夜郎

昆彌

松外

諸蠻

吐蕃

柔甘

長河

西魚

通寧遠

董卜

韓胡

烏

斯藏

大寶法王

大乘法王

大慈法王

開化

化

王贊善王護教王開教王輔教王  
西天阿難功德國尼八刺國地湧塔國

麻葉覓陀洹南毗蘇門答刺覽邦  
澹巴百花那孤兒黎伐南潑利柯

枝小葛蘭大  
葛蘭錫蘭山

第三邊防西正西沙州赤斤蒙古罕東安  
定阿端察遜哈馬爾

哈密土魯番火州柳城衛喇特  
茲于闐吐渾黨項大食拂菻波

斯撒瑪爾罕哈魯達爾瑪實喇哈雅  
塔什罕薩蘭克實特爾默布哈爾

琿夷沙喇斯納蘇察罕哈喇溫圖  
琿巴達克山愛達罕喀什噶爾伊

怕罕呼刺濟奇爾瑪勒白松虎兒  
珠爾日洛默色爾都爾蘇薩哈勒  
敏

羅密 坤城 阿蘇 天方 默德訥 榜葛  
刺 治 納 撲兒 祖 法兒 木 骨 都 束 不 刺

哇 竹 步 阿 丹 刺 撒 麻 林 忽 魯 謨 斯  
溜 山 南 亞 里 加 異 勒 甘 巴 里 急 蘭

丹 沙 里 灣 泥 千 里 達 失 刺 比 古 里 班  
卒 刺 泥 白 葛 達 黑 葛 達 西 洋 古 里

西 洋 瑣 里 西 北 伊 里 巴 拉 準 布 突 厥  
意 大 里 亞 回 鶻 點 憂 斯 沙 陀

#### 第四邊防北

正北

韃 靼 朮 顏 泰 寧 福 餘 契  
鬼 國 珠 巴 克 烏 爾 古

丹 附 近 諸 國 鐵 甸 東 北 合 渤 海 哈 斯 罕 富 珠 哩 烏  
鐵 驪 博 囉 滿 達 定 安

室 韋

#### 邊防東序畧

臣等謹按杜氏邊防典東方凡二十國閩越自漢以降已置為郡縣百濟新羅滅貊遞為朝鮮所併惟朝鮮日本琉球諸史遞各有傳他若耽羅納貢於元呂宋佛郎機等通使於明皆杜氏所未經臚載又如高麗有史有鑑日本有東鑑琉球有中山世鑑圖足與正史相參稽者並可蒐葺以為訂證之一助至於朝鮮諸國山川土俗已見杜典者不復贅錄扶桑文身諸國南北史後無聞者不更纂

叙祇期徵信焉爾洪惟我

朝發祥東土自

遠祖定三姓之亂居俄漠惠之野俄多里城

國號滿洲是為我

大清開基之始逮

肇祖原皇帝始居呼蘭哈達山下之赫圖阿喇地方締造

興京用基王業至

太祖高皇帝誕膺

天眷初樹鴻圖遂定都於瀋陽

太宗文皇帝營造

宮闕號曰

盛京於是全遼之地悉歸撫定蓋東方居生物之位  
實符出震之義自開闢以來扶輿鍾毓以待首出  
之

聖人其詳具見

欽定滿洲源流考茲不復恭載謹於序畧之內識緣起

云

正東

朝鮮

自唐迄元皆曰高麗  
明始復朝鮮之號

朝鮮東跨海距新羅南亦跨海距百濟西北度遼水與  
營州接北靺鞨俗知文字喜讀書士女服尚白地產銅  
銀及龍鬚席白碓紙狼尾筆唐高宗總章初李勣平高  
麗擒其王高藏歸高氏君長遂絕武后聖歷中以高藏  
子德武為安東都督後復稍自立國憲宗元和末遣使



者獻樂工後唐莊宗同光元年遣廣評侍郎韓申一春  
部少卿朴巖來其後有王建代主其國遷都於松岳明  
宗長興三年權知國事王建遣使者來乃拜建為元菟  
州都督充大義軍使封高麗國王建以平壤為西京王  
氏三世終五代屢來朝貢宋太祖建隆三年高麗國王  
昭遣廣評侍郎李興祐等來朝貢錫以制書昭卒其子  
佖襲於太宗時遣國人金行成入就學行成擢進士第  
累官至殿中丞後通判安州太平興國七年佖卒其弟

治襲雍熙元年遣使來貢又遣本國學生崔罕王彬詣  
國子監肄業端拱二年詔賜監板九經三年賜崔罕王  
彬等及第遣歸後受制於契丹朝貢中絕高麗調兵守  
六城契丹大舉伐之真宗大中祥符七年復遣使來貢  
神宗熙寧中屢遣使言欲遠契丹乞改途由明州詣闕  
從之哲宗元祐四年遣使持二金塔為兩宮壽蘇軾奏  
却之七年復遣使獻黃帝鍼經請市書甚衆仍用蘇軾  
奏弗許然卒市冊府元龜以歸至孝宗隆興後使命乃

絕遼太祖神冊間高麗遣使進寶劔聖宗統和十年以  
東京留守蕭恒德伐高麗十一年王治遣朴良柔奉表  
請罪因遣使冊治為王治傳子誦二十八年高麗西京  
留守康肇弒其主誦擅立誦從兄詢遼伐高麗肇拒戰  
被執先是詢上表請朝至開泰元年稱病不能朝四年  
命耶律世良蕭虛烈伐之八年復會兵進討詢乃降金  
滅遼高麗遣使通好於金太祖收國二年來賀伐遼之  
捷且請保州太祖曰爾自取之太宗天會四年高麗遣

使奉表稱藩優詔答之仍賜保州地嗣後高麗使賀正  
旦及天清節萬壽節史不絕書元太祖十一年契丹人  
祿格等竄據高麗江東城元遣兵征之國人洪大宣詣  
軍降共討滅祿格太宗三年以高麗殺使者命徹爾台  
征其國國人洪福源迎降其主王瞰請和許之遂設官  
分鎮所取之地而還明年瞰盡殺所置達嚕噶齊七十  
二人以叛復遣兵征之瞰遣使上表謝過自後叛服不  
常世祖至元七年其西京內屬改置東寧路總管府畫

慈悲嶺為界以孟克圖為安撫使率兵戍其西境其後遣使奉表歲修職貢明太祖洪武元年遣使賜王顥璽書二年顥表賀貢方物且請封詔賜金印誥文封為高麗國王顥復遣成惟德等上表謝賜以六經四書通鑑七年顥為權相李仁人所弑而立寵臣辛旽之子禍禍傳子昌二十二年李成桂廢之復立王氏裔定昌國院君瑤二十五年瑤出居原州成桂主國事更名旦遣使請改國號命仍古號曰朝鮮自是王氏始絕成祖永樂

欽定四庫全書

朝鮮列傳  
卷一百四十七

元年朝鮮請冕服書籍許之宣宗宣德八年朝鮮請遣子弟入學不許神宗萬厯二十年為日本關白平秀吉所侵掠朝鮮王李昖奔平壤城已復走義州八道幾盡沒遣使求援中國乃以宋應昌為經畧李如松為提督分布諸將攻戰終莫能勝至二十六年平秀吉死諸倭撤兵去而其國始安

減

減居朝鮮之東戶二萬俗常用四月節祭天晝夜飲酒

歌舞遼太祖天顯元年滅貊來貢聖宗開泰三年以其地為開州鎮國軍

耽羅

耽羅高麗屬國也元世祖既臣服高麗以耽羅為呂宋日本衝要乃遣將平之即其地立耽羅國招討司後改為軍民安撫司其貢賦歲進毛施布百匹後高麗以為言遂復隸高麗

新羅

新羅國其王姓金氏所居曰金城官有宰相侍中司農卿太府令其俗元日相慶拜日月神男子褐袴婦長襦見人跪以手踞地為恭市皆婦女貿販唐高宗上元中分取百濟地遂抵高麗南境元宗開元中其王金興光數入朝獻果下馬朝霞紬魚牙紬海豹皮又遣子弟入太學興光卒元宗命邢璣弔祭曰新羅號君子國知詩書以卿惇儒故持節往宜衍經誼使知大國之盛自是歲朝獻會昌後不復至後唐莊宗同光元年其王金朴



英遣使者來朝貢四年權知國事金溥遣使來晉以後  
不復至遼太祖九年新羅遣使貢方物天贊四年復來  
貢聖宗統和中設朝天館於大定府以待之

長人

長人國在新羅之東長身猓獐不火食噬禽獸或搏人  
以食其國連山數十里有峽固以鐵闔號關門新羅常  
屯弩士數千守之

日本

日本古倭國唐高宗咸亨初改名日本地環海惟東北  
限大山有五畿七道三島其城池附山城築四座每城  
周三四里巖石高聳限以大河內大樓閣九層粧黃金  
下隔小房百餘間夜則東西遊臥令人不知其處氣候  
溫暖草木冬青土地膏腴水多陸少俗以捕魚為業元  
宗開元天寶間相繼來朝肅宗上元中新羅梗海道乃  
繇明州越州朝貢德宗建中元年使者真人興能獻方  
物真人蓋因官而氏者也興能善書其紙似繭而澤人

莫識貞元末遣使者朝其所携學子及浮屠等願留肄業閱二十餘年使者來請肄業者還國詔可宋太宗雍熙元年日本國僧奝然與其徒浮海而至獻銅器十餘事並本國職員考年代紀各一卷奝然善隸書而不通華言問其風土但書以對云國中有五經及佛經白居易集並得自中國土宜五穀而少麥交易用錢文曰乾文大寶畜有水牛驢羊多犀象產絲蠶及織絹樂有國中高麗二部東嶽州出黃金西別島出白銀以為貢賦

國王以王為姓傳襲至今六十四世文武僚吏皆世官  
太宗閱其書撫之甚厚賜紫衣館於太平興國寺二年  
隨台州寧海商人船歸其國是後連貢方物而來者皆  
僧也元世祖至元八年命少中大夫秘書監趙良弼使  
日本日本始遣彌四郎入朝帝宴勞遣之後以致書不  
報命范文虎等帥舟師十萬征之至五龍山遭暴風軍  
盡沒後屢招不至終元世不相通明太祖洪武四年日  
本國王良懷遣使奉表稱臣貢方物後復遣王子來入

國學帝善待之特授觀察使永樂元年貢使至上王源  
道義表及貢物四年封其國中山為壽安鎮國之山御  
製碑文立其上五年六年頻入貢嗣後雖屢遣使入貢  
然海寇亦不絕穆宗隆慶後倭酋關白平秀吉者並治  
兵征服旁近諸小國遣其帥清正等率舟師逼釜山屢  
次入犯及其國內亂乃止

邪古 波邪 多尼

邪古波邪多尼三小國在日本之東海嶼中北距新羅

西北距百濟西南直越州產絲絮

婆羅

婆羅又名文菜東洋盡處也其地負山面海崇釋教禁食豕肉有禮拜寺每祭用犧唐高宗時婆羅國入貢明成祖永樂三年遣使者齎璽書綵幣撫諭其王四年其國東西二王並遣使奉表朝貢神宗萬厯時為婆羅國王者乃閩人也或言鄭和使婆羅有閩人從之留居焉其後人竟據有其國王有金印一篆文作獸形民間嫁

娶必請此印印背上以為榮後佛郎機舉兵來擊王率國人走山谷中放藥水流毒殺佛郎機人因得返國

馮嘉施蘭

馮嘉施蘭東洋小國明成祖永樂四年八月其酋嘉馬銀等來朝貢方物賜鈔幣有差六年八年復來朝貢

東南

雞籠山

雞籠山在澎湖嶼東北故名北港又名東番去泉山甚

通地多大山澤叢篁深箐夾以溪流溪流入海水淡故  
其外名淡水洋無君長有十五社社多者千人少或五  
六百人無徭賦以子女多者為雄聽其號令雖居海中  
畏海不善操舟罕與隣國往來俗尚勇暇即習走日可  
數百里足皮厚數分履荊棘如平地所產竹大至數拱  
長十丈以竹構屋覆之以茅聚族而居明成祖永樂中  
鄭和徧至東西洋靡不獻琛恐後獨此番遠避不至世  
宗嘉靖末雞籠山人遭倭焚掠避居山後嗣有紅毛番



至此因事耕鑿設闡闡稱臺灣焉明末給事中何楷陳靖海之策大率以臺灣為奸民之窟欲逐去紅毛時不能用

琉球

宋史作流求  
元史作瑠求

琉球在東南海中與漳泉興福四州界相值舟行數日可至每歲稻再熟花常開燕以七月來不巢人屋鷹以白露日至物產硫磺胡椒等物其王每視朝羣臣搓手膜拜移時方起其俗凡有宴會餽饌各盤貯而不相共

飲酒則止以一杯相傳宋孝宗淳熙時其王舜天依日本書制字母四十七名依魯花畧仿切音三十六字母意元世祖至元二十八年海船副萬戶楊祥請以六千軍往降之給金符賫詔以行出海洋遽掠一山軍小挫未至琉球引還成宗元貞三年福建省平章政事高興上言琉球可圖狀遣省都鎮撫張浩等襲之擒生口百三十餘人抗命如故其國至元末分為三曰中山曰山南曰山北其王皆以尚為姓而中山最强明太祖洪武

五年命行人楊載詔諭之中山王察度遂遣使入貢賜  
賚有加許陪臣子弟入國學肄業於是山南王承察度  
山北王帕尼芝亦相繼臣服成祖永樂中琉球中山山  
南山北三王屢入貢子弟俱入國學肄業其嗣王立俱  
遣使冊封之十三年以後山北王不復遣使宣宗宣德  
四年後山南王亦不復至云為中山王所併中山王屢  
世朝貢不絕

三嶼

三嶼近琉球元世祖至元三十年欲選人招誘之平章  
政事巴延等言此國之民不及二百戶去年軍船入琉  
球過其國國人餉以糧館我將校無他志也乞不遣使  
帝從之

呂宋

呂宋居東南海中在臺灣鳳山沙馬崎之東南俗少爭  
訟出入佩刀自衛國有機易山產金銀明太祖洪武五  
年遣使入貢成祖永樂三年遣官齎詔撫諭其國八年

復來貢自後久不至神宗萬歷四年官軍追海寇至其國國人助討有功復朝貢時佛郎機強與呂宋互市久之築室其地竟乘其無備襲殺其王而據其國名仍呂宋實佛郎機也

合貓里

合貓里海中小國近呂宋又名貓里務其國多山山外大海饒魚鱸人知耕稼商船往來漸成富壤華人入其國不敢欺凌市法最平明成祖永樂三年遣使朝貢

沙瑶 叻啤

沙瑶與叻啤連壤叻啤啤在海畔沙瑶稍紆入山隈  
皆與呂宋近男女蓄髮垂髻以板為城豎木覆茅為室  
崇釋教多建禮拜寺物產甚薄後佛郎機據呂宋多侵  
奪鄰近惟二國號令不能及

古麻刺朗

古麻刺朗東南海中小國明成祖永樂十五年遣中官  
張謙賫敕撫諭賜之絨綿紵絲紗其王幹刺義亦奔敦

率妻子陪臣隨謙來朝貢方物禮之如蘇祿國賜以印  
詔冠帶金錢文綺明年還至福建邁疾卒賜諡康靖命  
其子必刺嗣為王賜鈔幣率衆歸

文郎馬神

文郎馬神處東南海中以木為城其半倚山民多縛木  
水上築室以居男女用五色布纏頭腹背多袒初用蕉  
葉為食器後與華人市漸用磁器其俗惡淫奸者論死  
隣境有買哇柔者性克狠商人畏之夜必嚴更以待所

產有孔雀鸚鵡沙金降香藤席等物

美洛居

美洛居俗訛為米六合居東海中頗稱饒富酋出威儀甚備所部合掌伏道旁男子削髮女椎結地有香山雨後香墮沿流滿地居民拾取不竭其酋委積充棟以待商船之售明神宗萬歷時紅毛番與佛郎機交爭美洛居地每歲構兵人不堪命華人流寓者說二國令各罷兵分國中萬老高山為界山以北屬紅毛番南屬佛郎



機始稍休息而美洛居竟為兩國所分

佛郎機

佛郎機近美洛居又稱干系臘國時恃強陵轢諸國無所不往所產多犀象珠貝衣服華潔貴者冠賤者笠初奉佛教復奉天主教俗不立契約有事指天為誓不相負明武宗正德十三年佛郎機請封詔拒之世宗嘉靖二年佛郎機入寇官軍擊走之先是其別將都盧以巨礮利兵橫行海上官軍擊擒之獲二舟得其礮即名為

佛郎機副使汪鉉進之朝用以守墩臺城堡火礮之有  
佛郎機自此始

和蘭

和蘭又名紅毛番地近佛郎機所恃惟巨舟大礮舟長  
三十丈廣六丈厚二尺餘樹五桅桅下置二丈巨鐵礮  
發之可洞裂石城震十里世所稱紅夷礮即其製其柁  
後置照海鏡大徑數尺能照數百里其人悉奉天主教  
所產有金銀琥珀瑪瑙玻璃諸物其國甚富明神宗萬

歷二十九年和蘭駕大艦薄香山旋引去三十二年駕  
艦抵澎湖熹宗天啟四年巡撫南居益發兵攻破和蘭  
澎湖之警以息



欽定續通典卷一百四十七

欽定四庫全書

欽定續通典卷一百四十八

邊防

邊防南序略

臣等謹案杜氏邊防典南方凡五十六部諸蠻獠之散居溪峒者於楚蜀嶺粵滇黔諸境為多唐宋各有土州以示羈縻元明增置土官土吏使自統攝而叛服不常誅賞互用往往勞師動衆若南詔

蠻在唐宋時自成一國宋時若儂氏之亂明時若大藤峽田州之役皆蔓延經年久而後定則以控馭之道未盡善也至於海南諸國稱名互異如赤土之後為暹羅林邑之後為環王又為占城頓遜之後為滿刺加訶陵之後為閩婆又為爪哇干陀利之後為三佛齊又為舊港槃槃之後為柯枝狼牙修之後為錫蘭山名雖殊而實則同又當按時代為臚列者矣他若馬八兒諸國之始通於元彭

亨柔佛諸國之始通於明並撫其風土叙次於篇  
正南

盤瓠種

盤瓠種自三國後種落皆布在諸郡縣隋置辰州以處  
蠻唐置溪州錦州叙州巫州皆是也唐季蠻酋分據其  
地自署刺史晉高祖天福中馬希範襲父業有湖南溪  
州刺史彭自然等以溪錦等州歸馬氏立銅柱為界宋  
太祖建隆四年慕容延釗平湖湘知溪州彭允林刺史

田洪贊等列狀歸順詔復其官太宗太平興國八年溪  
錦叙巫四州蠻相率詣辰州願比內郡民輸租賦詔不  
許自後首領入貢不絕真宗咸平中施州蠻與溪州蠻  
歲輸粟易鹽邊粟有三年之積神宗熙寧初峽州洞酋  
刻剝無度蠻衆願內附屬辰州遂以章惇察訪湖北經  
制蠻事於是南江舒氏北江彭氏等蠻相繼納土元初  
置沿溪洞招討使司

西原蠻



西原蠻居廣容之南邕桂之西有甯氏者相承為豪又有黃氏居黃橙洞其地西接南詔唐元宗天寶初黃氏強與韋氏周氏儂氏相唇齒為寇據十餘州韋氏周氏恥不肯附黃氏攻之逐於海濱肅宗至德初首領黃乾曜等與諸洞蠻叛乾元初討平之俄復叛文宗太和中討平洞穴其後儂洞最強結南詔為助宋時儂氏世為廣源州首領及智高僭號始命狄青平之

### 南詔

南詔本烏蠻別種姓蒙氏蠻謂王為詔其先渠帥有六  
自號六詔曰蒙騫詔越析詔浪穹詔邏賧詔施浪詔蒙  
舍詔兵力相埒各自雄長蒙舍詔在諸部南故稱南詔  
唐元宗開元初皮邏閣立二十六年詔封越國公賜名  
歸義時五詔微歸義獨強乃厚以利啖劍南節度使王  
昱求合六詔為一制可又以破洱蠻功冊為雲南王歸  
義死閣羅鳳立襲王後與雲南太守張虔陀隙舉兵反  
代宗大曆十四年其孫異牟尋立於德宗貞元中復內

附唐末蒙氏後絕東川節度使楊于貞據之晉高祖天福二年段思平逐楊氏而有其國改號大理宋神宗熙寧九年遣使貢金裝碧玕山氍毹刀劍等物後不常來徽宗政和五年復通貢元滅之而有其地設大理府明時比於中州列郡

文面濮 赤口濮 黑棘濮

三濮在雲南徼外千五百餘里唐高宗龍朔初遣使朝貢

驃

驃國在雲南徼外其王自號突羅朱青臂為圓城有十二門四隅作浮圖俗奉佛法以金銀為錢形如半月號登伽陀無膏油以蠟雜香代炷唐德宗貞元中其王雍羌聞南詔歸附遣使獻歌曲因遣弟舒難陀詣劍南西川節度使韋臯獻其國樂臯譜次其聲進諸朝詔授舒難陀太僕卿

緬

緬國古朱波地在雲南西南徼外其人有城郭屋廬以居有象馬以乘舟筏以濟文字進上者用金葉寫之次用紙有大城五宋寧宗時緬甸進白象元世祖至元十九年擊緬克其江頭城及太公城成宗大德元年封的立普哇拿阿地提牙為王賜之銀印子信合八的為世子賜以虎符後即其蒲甘城置邦牙等處宣慰使司明太祖洪武二十七年置緬中宣慰使司成祖永樂元年置緬甸宣慰使司於是緬有二宣慰使宣宗宣德二年

以莽得刺為宣慰使而緬中宣慰之名不復見世宗嘉靖初孟養酋思倫擊破緬殺宣慰莽紀歲分據其地緬訴於朝不報莽紀歲子瑞體攻孟養及迤西諸蠻并欲入寇既覘知有備又慮他蠻襲其後乃遁歸俄瑞體死子應裏嗣神宗萬曆十一年寇順寧游擊劉綏等擊破之二十二年巡撫陳用賓設八關戍守自此不犯邊界

安南

安南古交趾也在中國西南與雲南徼外接界倚富良

江為天險江水自緬甸滇南兩道流入漢置九郡交趾  
居其一焉土膏腴氣候熱穀歲二稔人性獷悍唐分嶺  
南為東西二道安南隸之高祖武德中號交州總管府

調露

元和郡縣志作永徽

元年改安南都護府隸嶺南道肅宗至

德二載曰鎮南都護府代宗大歷中復為安南梁末帝  
貞明中土豪曲承美專有其地送款於末帝授節鉞時  
劉隱擅命嶺表併有之後部內大亂宋初丁部領繼其  
父公著安撫境內上表貢方物封為交趾郡王屢遣使

來貢其子丁璉繼之璉卒其臣黎桓幽璉之幼弟璿自  
統其衆遣使來修職貢真宗御極封桓南平王三傳為  
大校李公蘊所篡遣使奉貢用桓故事封之子孫世襲  
受封修貢八傳至昊昂無子其壻陳日昃遂有其國理  
宗淳祐二年詔授安南國王元世祖兵抵安南入其國  
日昃竄海島師旋乃還國傳子光曷納款中統二年封  
為安南國王其後叛服不常仁宗延祐以後始疆場寧  
謐貢獻不絕明太祖洪武初陳日燿遣使來朝貢方



物封賜有加二十一年帝以其頻煩且貢物侈命仍三年一貢建文帝建文元年其國相黎季犛篡立遂盡殺陳氏宗族成祖永樂時命征夷將軍張輔等大破之訪求陳氏子孫耆老千餘詣軍門言陳氏已滅無可繼者安南本中國地乞仍入職方同內郡詔改安南為交趾設郡縣後黎利等復叛宣宗宣德二年遣使撫諭并盡撤軍民北還六年命黎利權署安南國事英宗正統元年封黎利子麟為安南國王世宗嘉靖十八年安南莫

登庸令其黨偽為黎廣禪詔篡其位逮莫氏漸衰黎氏復興互相構兵終明世兩姓分據不能歸於一

南掌

南掌古越裳地居安南暹羅之間明成祖永樂初酋長刁線歹始入貢方物其俗佩雕爪為飾故呼為撾家性獷悍身及眉目皆刺花相傳酋長三等大曰招木弄次曰招木牛又次曰招木花產犀牛海貝象及木香訶子乳香

暹羅

暹羅本扶南之別種後分為暹與羅斛二國暹土瘠不宜稼羅斛地平行種多獲暹仰給焉元成宗元貞元年暹國進金字表欲朝廷遣使至其國比其表至已先遣使蓋彼未之知也賜來使素金符佩之追前詔使同往其後羅斛強併有暹地遂稱暹羅斛國明太祖洪武四年其王參烈昭毘牙遣使奉表來貢十年賜之印文曰暹羅國王之印自是其國遵朝命始稱暹羅比年一貢

或一年兩貢至英宗正統後或數年一貢其國崇信釋教氣候不正或寒或熱地卑濕人皆樓居男女椎結貢有象象牙孔雀六足龜寶石珊瑚檀速諸香胡椒豆蔻之類

彭亨

彭亨在暹羅之西氣候常溫米粟饒足煮海為鹽釀椰漿為酒上下親狎無寇賊俗尚巫覡明太祖洪武十一年彭亨王麻哈刺惹荅饒遣使賫表來朝成祖永樂九

年其王巴剌密瑣剌達羅息泥復遣使至十年十四年  
兩遣鄭和報之所貢有象牙片腦乳香蘇木胡椒之屬

### 丹眉流

丹眉流在廣州西南俗皆板屋跣足衣布以白紵纏首  
其王所居廣袤五里無城郭出則乘象車亦有小駟四  
時炎熱無霜雪土產犀象紫草蘇木諸藥宋真宗咸平  
四年國王多須機遣使打吉馬等九人來貢召見崇德  
殿賜以冠帶服物及還又賜多須機詔書以敦獎之

欽定四庫全書

欽定續通典  
卷一百四十八

九

占城

即杜典  
林邑

占城在中國之南東至海西至雲南南至真臘其國有  
百餘村村落戶三五百或至七百亦有縣鎮之名四時  
皆似夏草木常青民以漁為業不解朔望但以月生為  
初月晦為盡不置閏分晝夜為十更非日不起非夜分  
不卧見月則飲酒歌舞為樂唐時或稱占婆其王所居  
曰占城高宗永徽至元宗天寶凡三入貢肅宗至德後  
更號環王迄周宋遂以占城為號宋太祖建隆二年其

王遣使來朝表章書於貝多葉以香木函盛之後屢貢  
方物孝宗淳熙四年占城王以舟師襲真臘國都寧宗  
慶元以後真臘大舉破占城立真臘人為王占城遂為  
真臘屬國矣元世祖至元十六年遣使諭占城十七年  
占城國王遣使奉表貢方物十九年即其地立省以安  
撫之既而占城王子專國負固弗服萬戶何子志等被  
執遣兵征之卒不能定明太祖洪武時其王遣使來朝  
尋命使齎詔封為占城國王又遣使往祭其山川頒科

舉詔於其國後占城與安南國屢構兵中朝遣使諭解  
之世宗嘉靖二十二年貢使訴安南侵擾道阻難歸乞  
遣官護送還國從之

賓童龍

賓童龍與占城接壤或言如來入舍衛國乞食即其地  
氣候草木人物風土類占城

滿刺加

即杜典  
頻遜

滿刺加在占城南有山出泉流為溪土人淘沙取錫煎



成塊曰斗錫氣候朝熱暮寒男女椎結身體黝黑間有  
白者則異種也俗淳厚市道頗平明成祖永樂元年遣  
中官尹慶使滿刺加宣示威德及招徠意其酋大喜遣  
使至京因封為滿刺加國王後率其妻子陪臣相繼來  
朝宴賚極厚武宗正德末佛郎機奪其地改名麻六甲  
其所貢物有瑪瑙珊瑚犀角象牙薔薇露蘇合油沈速  
香阿魏之屬

阿魯

阿魯亦名亞魯近滿刺加順風三日夜可至田瘠少收  
成藝甘蕉椰子為食明成祖永樂九年阿魯王遣使來  
朝十七年其王子復遣使來朝十九年二十一年再入  
貢

瓜哇

即杜典  
訶陵

瓜哇即古闍婆國亦號訶陵近占城行二十晝夜可至  
為東南諸蕃之衝水有八節澗乃瓜哇咽喉其建國始  
於漢宣帝元康元年地廣人稠性克悍男女無少長皆

佩刀稍忤輒相賊其甲兵為諸番之最字類瑣里氣候  
常似夏稻歲二稔唐太宗貞觀中遣使入貢太宗以璽  
詔優答高宗上元間國人推女子為王號悉莫威令整  
肅道不拾遺代宗大厯中訶陵使者三至憲宗元和文  
宗太和懿宗咸通時皆來朝貢宋太宗淳化三年闍婆  
國王遣使來朝徽宗大觀中復貢元時改名瓜哇世祖  
至元二十九年詔出師征瓜哇值瓜哇方與鄰國葛郎  
構難即納降於元誘元兵共攻破葛郎復反攻元兵元

兵失傷甚衆明太祖洪武二年遣使以即位詔諭瓜哇  
三年又以平定沙漠頒詔於其國其王遣使奉金葉表  
來朝自是率每歲一至其國自元末分東西二王成祖  
永樂四年東王為西王所滅宣宗宣德七年入貢者乃  
西王也其國有新村最饒富中華及諸番商舶輻輳其  
地寶貨填溢永樂時其村主自遣使表貢方物

重迦羅

重迦羅瓜哇隣國也高山奇秀內有一石洞前後三門

可容萬人田穀氣候與瓜哇畧同國無酋長推年長者主之

日羅夏治 磔里

日羅夏治與磔里俱近瓜哇俗尚釋教明成祖永樂三年各遣使附瓜哇使臣入貢磔里俗淳物產甚薄日羅夏治止產蘇木胡椒

丁機宜

丁機宜瓜哇屬國也幅員甚狹僅千餘家時被柔佛侵

擾後以厚幣求婚稍獲寧處其國以木為城酋所居旁  
列鐘鼓樓出入乘象以十月為歲首民俗類瓜哇物產  
悉如柔佛酒禁甚嚴有常稅大家皆不飲惟細民無籍  
者飲之其曹偶咸非笑焉

### 蘇吉丹

蘇吉丹亦瓜哇屬國後訛為思吉港國在山中止數聚  
落其水滴舟不可泊有地名饒洞者形勢平行商舶皆  
就此貿易

柔佛

柔佛一名烏木礁林近丁機宜明神宗萬厯間其酋好  
構兵鄰國丁機宜與彭亨屢被其患國中覆茅為屋列  
木為城環以池無事則通商於外有事則召募為兵地  
不產穀常易米於鄰壤俗好持齋見星方食節序以四  
月為歲首喪用火葬所產有犀象玳瑁片腦沒藥錫蠟  
之屬

真臘

真臘在占城南其縣鎮風俗同占城一歲數稔以十月  
為歲首閏悉用九月俗尚釋教民俗饒富男女椎結唐  
神龍後分為二北多山阜者號陸真臘南饒陂澤者號  
水真臘水真臘地八百里王居婆羅提拔城陸真臘或  
曰文單曰婆鏤地七里元宗開元天寶時王子率其屬  
來朝拜果毅都尉代宗大厯中副王及妻來朝獻象憲  
宗元和中水真臘亦遣使入貢後復合為一宋徽宗政  
和六年遣使鳩摩僧歌等來貢賜以朝服僧歌請服所



賜詔從之仍以其事付史館寧宗慶元中滅占城而併  
其地更立真臘人為之王明太祖洪武三年遣使齎詔  
撫諭真臘四年其國遣使奉表朝貢成祖永樂中數被  
占城侵擾帝勅占城王罷兵修好景帝景泰後其使不  
常至

投和

投和在真臘南設官屬無賦稅民以多少自輸唐太宗  
貞觀中遣使以黃金函奉表并獻方物

婆利

婆利在占城東南地有大洲多馬產火珠大者如鷄卵  
圓光照數尺日中以艾藉珠輒火出其國法殺人及盜  
截其手姦者鑕其足期年而止祭祀必以月晦盤貯酒  
穀浮之流水每十一月必設大祭

三佛齊

即杜典  
干陀利

三佛齊與占城為隣居真臘閩婆之間所管有十五州  
氣候多熱少寒土產紅藤紫礦沈香檳榔椰子之屬無

麥有米豆鵝鴨鷄魚頗類中土城周數十里用椰葉覆屋不輸租賦其王號詹卑其國居人多蒲姓庶民皆水居編筏築室係之於樁欲徙則拔樁去之唐昭宗天祐元年貢方物授其使都番長蒲訶嚛為寧遠將軍宋太祖建隆元年其王遣使來朝自是迄高宗紹興孝宗淳熙間恒通貢明太祖洪武三年遣使詔諭三佛齊其王遣使奉金葉表隨入貢八年嗣子表貢請命勅封為王三十年爪哇據其國改名舊港亦不能盡有其地華人

往往寓焉其地為諸番要會俗習水戰隣國多畏之

蘇祿

蘇祿近勃泥閩婆明太祖洪武初發兵侵勃泥大獲其人畜以閩婆授兵至乃還其國分東王西王峒王而以西王為尊成祖永樂十五年三王子來朝進金縷表文獻珍珠寶石等物因並封為國王賜印誥襲衣冠帶及鞍物儀仗器物居二十七日三王辭歸其東王次德州卒於館帝遣官賜祭命有司營葬勒碑墓道謚曰恭定

乃遣使齎勅封其長子為蘇祿國王十八年東王之母  
遣使來朝貢大珠神宗萬厯時佛郎機屢攻之城據山  
險不能下其地少粟麥民率食魚蝦螺蛤短髮纏皂縵  
煮海為鹽釀蔗為酒氣候常暑產竹布玳瑁諸物

### 勃泥

勃泥本閩婆屬國也所管有十四州以板為城城中居  
者萬餘人其王所居屋覆以貝多葉民舍覆以草在王  
左右者為大人俗以十二月七日為歲節地熱多風雨

無麥有麻稻及魚羊無蠶絲用吉貝花織成布宋太宗  
太平興國二年遣使進表貢方物神宗元豐五年復遣  
使入貢明太祖洪武四年遣使奉金銀箋來朝成祖永  
樂三年詔封勃泥國王賜印符誥命六年王率妃及子  
弟妹陪臣凡百五十餘人來朝貢珍物賜宴奉天門乞  
封其國之後山為一方鎮御製碑文賜之九年嗣王復  
偕其母來朝至仁宗洪熙元年四入貢嗣後貢使雖稀  
商人往來不絕

層檀

層檀在海南宋神宗熙寧七年始入貢海道便風行百六十日經勿巡吉林三佛齊國乃至廣州人語音如大食元豐六年使者再至神宗念其絕遠賜賚有加

巴喇西

巴喇西在南海去中國絕遠明武宗正德六年遣使臣來朝進金葉表貢祖母綠珊瑚樹等物嘉其遠來賜賚有加

瞻博

瞻博或曰瞻婆北距兢伽河多野象唐高宗顯慶中與  
婆岸干支弗舍跋若磨臘四國並遣使入貢

修羅分

修羅分地近真臘有君長以木為城有勝兵二萬其風  
俗與歌羅舍分甘畢相類甘畢在南海上王名旃陀越  
摩歌羅舍分在南海南唐時三國皆貢方物

室利佛逝

室利佛逝一曰尸利佛誓過軍徒弄山二千里至其國



有城十二地產金永砂龍腦唐高宗咸亨至文宗開成  
間數遣使來朝

名篋

名篋所屬有州三十以十二月為歲首賦二十取一唐  
高宗龍朔初遣使來貢

單單

單單與名篋相近亦有州縣其王近行乘車遠乘象唐  
高宗乾封總章時來獻方物

注輦

注輦去中國最遠自古未嘗相通宋真宗大中祥符八年其國王羅茶羅乍始遣使奉表來貢自天禧至仁宗明道神宗熙寧時皆遣使奉方物入貢其國城有七重所統有三十一部落產真珠象牙珊瑚檳榔豆蔻之屬地宜竹饒花果穀有麥稻及黑綠豆

馬八兒諸國

馬八兒與俱藍國接壤比餘國最大元世祖至元間璽

書招諭諸番占城與馬八兒俱奉表稱藩而俱藍諸國  
未下尋遣廣東招討使楊廷璧招降俱藍國王王即遣  
使入貢俱藍既下餘國曰須門那曰僧急里曰南無力  
曰馬蘭丹曰那旺曰丁呵兒曰來來曰急蘭亦解皆遣  
使入貢方物

## 西南

渝州蠻

即杜典板楠  
蠻南平蠻

渝州蠻其地西南接烏蠻昆明哥蠻大小部族數十居

之宋英宗治平中熟夷李光吉梁秀等據其地各有衆數千以威勢脅誘漢戶神宗熙寧三年進兵討平之以賓化砦為隆化縣隸涪州建榮懿扶歡兩砦其外居銅佛埧者隸涪州南川縣地皆膏腴自光吉等平他部族據有之因命其土人王才進充巡檢委之控扼才進死部族無所統數出寇邊詔熊本討平之建為南平軍以涪州南川涪州隆化隸焉

兩翼

兩爨蠻自曲州靖州西南至龍和城者謂之西爨白蠻  
自彌鹿升麻二川南至步頭者謂之東爨烏蠻西爨所  
產多駿馬犀象唐太宗貞觀時開青蛉弄棟為縣東爨  
居安寧城首領蓋聘為西爨歸王所襲殺部落各分散

### 東謝

東謝蠻在西爨之南其南距守宮獠西連夷子地宜五  
穀衆處山汲流以飲無賦稅見貴人則執鞭而拜賞有  
功者以牛馬銅鼓犯小罪則杖大罪殺之盜物者倍償

婚姻以牛酒為聘會聚擊銅鼓吹角坐必蹲踞唐太宗  
貞觀時酋長謝元深入朝中書侍郎顏師古奏言昔周  
武王時遠國入款周史書其事為王會篇今萬國來朝  
冠服實可圖寫請撰為王會圖從之以其地為應州即  
拜元深為刺史又有南謝酋領謝疆來朝以其地為莊  
州授疆為刺史

牂牁

牂牁國在昆明東九百里無城郭土鬱熱多霖雨稻粟

再熟無徭役刻木為契風俗物產與東謝同唐文宗開  
成元年其酋阿佩內屬武宗會昌中封其別帥為羅殿  
王世襲爵其後又封別帥為滇王皆牂牁蠻也宋真宗  
景德元年詔西南牂牁諸國進奉使親至朝廷者令廣  
南西路發兵援之勿抑其意先是龍光進等來朝上矜  
其道遠人馬多斃因詔宜州自今可就賜恩物至是懇  
請詣闕從之

充州

充州蠻即牂牁別部唐文宗天寶中以充州酋長趙珍  
裔為黔州都督屢敗南詔閣羅鳳護五溪十餘年部落  
以安德宗貞元憲宗元和以訖文宗開成朝貢不絕

夜郎

夜郎國唐置羈縻諸州費珍莊琰播郎夷牂等州皆是  
也宋太宗太平興國五年其酋龍瓊琚遣其子並諸州  
蠻以方物名馬來貢乃令作本國歌舞一人吹瓢笙數  
十輩連袂宛轉而舞以足頓地為節其曲名曰水曲部



族數十獨龍氏方氏張氏石氏羅氏五姓最著號五姓蠻其後又有程氏韋氏皆比附五姓故號西南七蕃云

### 昆彌

昆彌國亦稱昆明其土畝濕宜秔稻俗逐水草畜牧夏處高山冬入深谷唐高宗咸亨三年其十四姓率戶二萬內附析其地為殷州總州敦州以安輯之殷州居戎州西北總州居西南敦州居南遠不過五百餘里近三百里其後又置盤麻等四十一州皆以首領為刺史

松外諸蠻

松外諸蠻部族不一唐太宗貞觀中嵩州都督劉伯英  
疏言松外諸蠻率暫附亟叛請擊之西洱河天竺道可  
通也居數歲太宗以將軍梁建方發蜀十二州兵進討  
酋帥雙舍拒戰敗走殺獲甚衆諸蠻震駭走保山谷建  
方諭降者七十餘部戶十萬九千署首領蒙和為縣令  
餘衆感悅西洱河蠻亦納款軍門

吐蕃

吐蕃本西羌屬或曰南涼禿髮利鹿孤之後國多霆電  
風雹盛夏如中國春時山谷常冰地有寒癘聯毳帳以  
居手捧酒漿以飲稼有麥豆獸多牛馬犬羊天鼠之皮  
可為裘無文字俗重鬼喜浮屠法逐水草無常所其鎧  
胄精良唐太宗貞觀八年始遣使來朝後請婚許之漸  
習華風遣子弟入國學習詩書肅宗至德後因安史之  
亂攻陷河西隴右之地代宗永泰大厯間再遣使來聘  
宣宗大中三年吐蕃恐熱為亂唐節度使康季榮等次

第收復原秦安樂等三州及石門等七關唐末其國漸衰弱種類分散無復統一宋太祖建隆二年靈武五部以駝馬來貢真宗大中祥符八年嘉勒斯賚遣使來貢請討西夏以自効仁宗寶元元年詔使擊西夏嘉勒斯賚死地遂分惟棟戩最強獨有河北之地遣使奉貢常與官軍會擊西夏自後嗣者俱授官爵貢奉不絕神宗熙寧哲宗元符徽宗崇寧間三用師於其國遂建熙河一道置郡縣遼聖宗統和中來貢元世祖中統時郡縣

其地設官分職以吐蕃僧帕克斯巴為大寶法王帝師領之嗣者數世明太祖洪武六年大將軍徐達征西番既拔河州於是河州以西朶甘烏斯藏等部悉歸今故有官者皆至京授職

### 朶甘

朶甘在四川徼外唐吐蕃地南與烏斯藏隣元置宣慰詔討等官分統其衆明太祖洪武初遣使招撫遂來朝宴賚遣還繼改為行都指揮使司並賜銀印復增置招

討司千戶等官自是修貢惟謹英宗正統初諸番相率  
朝貢者八百二十九寨悉賜賚遣歸

長河西魚通寧遠

長河西魚通寧遠在四川徼外地通烏斯藏唐為吐蕃  
元置安撫司明太祖洪武時長河西土官遣使來朝貢  
方物宴賚遣還置長河西魚通寧遠宣慰司以其酋為  
宣慰使自是修貢不絕

董卜韓胡

董卜韓胡在四川威州之西明成祖永樂九年酋長南  
葛遣使奉表入朝貢方物置宣慰司景帝景泰三年進  
秩都指揮使其隣雜谷三年一貢惟董卜許比年一貢  
所隸別思寨及加渴瓦寺俱通貢

烏斯藏大寶法王

烏斯藏在四川西徼外其地多僧無城郭佛書甚多元  
世祖尊帕克斯巴為大寶法王錫玉印累入朝貢其徒  
嗣者咸稱國師明太祖洪武初遣使招諭烏斯藏攝帝

師遣使朝貢六年自入朝七年遣使來朝請封號賜以玉印成祖永樂元年遣使往徵其僧哈里瑪入朝封為大寶法王六年辭歸自是頻年入貢孝宗宏治武宗正德間或一年兩貢神宗萬厯年間有自稱活佛者求通貢許之此僧有異術即大寶法王及闡化諸王皆奉之諸番王徒擁虛位而已

大乘法王

大乘法王亦烏斯藏僧明成祖永樂十年來朝受封仁



宗洪熙宣宗宣德間並來貢憲宗成化四年其王旺布遣使來貢孝宗宏治元年其王桑節幹遣使來貢武宗正德十年請襲封世宗嘉靖十五年偕輔教諸王來貢嗣後奉貢不絕

### 大慈法王

大慈法王亦烏斯藏僧明成祖永樂十二年入朝禮亞大乘法王賜之印誥嗣後時來朝貢宣宗宣德九年入朝封大慈法王

闡化王

闡化王亦烏斯藏僧明太祖洪武五年封僧嘉木楊沙克嘉為灌頂國師以撫諭朶甘諸部明年其僧遣酋奉表入貢自是三年一貢成祖永樂四年封為闡化王十一年命楊三保復使其地今與贊善護教闡教三王共修驛站自是道路畢通其後入貢益頻特遣賜綵幣世宗嘉靖三年偕輔教王及大小三十六番請入貢穆宗隆慶三年定令三年一貢其後貢奉不替

贊善王

贊善王者靈藏僧也其地在四川徼外視烏斯藏稍近  
明成祖永樂四年其僧珠卜巴勒遣使入貢命為灌頂  
國師明年封贊善王自永樂迄英宗正統貢無定期憲  
宗成化元年始定三歲一貢之例嗣是屢請封襲世宗  
嘉靖後猶入貢如制

護教王

護教王者納木喀巴勒藏布衮確克僧也明成祖永樂

四年遣使入貢授灌頂國師明年封護教王賜印誥遂  
頻歲入貢仁宗洪熙宣宗宣德中並入貢後無嗣其爵  
遂絕

闡教王

闡教王者巴勒恭噶僧也明成祖永樂元年其國師端  
珠卜入貢四年又貢十一年加號大國師又封其僧琳  
沁巴勒濟特為闡教王賜印誥綵幣後比年一貢迄世  
宗嘉靖時修貢不輟

輔教王

輔教王者斯達克藏僧也地遠於烏斯藏明成祖永樂十一年封其僧納木喀埒克巴為輔教王通貢使賜予與諸法王等孝宗宏治十二年輔教等四王及長河西宣慰司並附入貢嗣後奉貢不絕

西天阿難功德國

西天阿難功德國西方番國也明太祖洪武七年王卜哈魯遣其講主來朝貢方物賜文綺及布帛諸物後不

復至又有和林國師多爾濟辰類錫喇卜藏布亦遣其  
講主獻銅佛舍利及元所授玉印圖書等命宴賚遣還  
明年國師入朝和林非西番其國師則番僧與功德國  
同時來貢後亦不復至

尼八刺國 地湧塔國

尼八刺國在諸藏之西其王皆僧也明太祖洪武十七  
年命僧智光往其國并使其隣境地湧塔國王馬達納  
羅摩遣使入朝貢金塔名馬方物賜以誥勅綵幣二十

三年再貢成祖永樂七年遣使來貢以銀幣賜其嗣王沙葛新的及地湧塔王可般明年來貢封為尼八刺國王賜印十六年來貢命使往報之所經罕諸靈藏巴勒恭噶烏斯藏及野藍卜納皆有賜宣宗宣德二年又遣使賜其王與地湧塔王自後貢使不復至又有速覲嵩者亦西方之國永樂三年遣使往招以道遠不至

麻葉甕

麻葉甕在西南海中自占城靈山放舟順風十晝夜至

交欄山其西南即麻葉甕山峻地平田膏腴收穫倍他國煮海為鹽釀蔗為酒男女椎結衣長衫圍之以布俗尚節義婦喪夫髡面剃髮終身不改嫁產玳瑁木棉黃蠟檳榔花布之屬又有葛布及連兒米囊二國明成祖永樂三年遣使賚璽書賜物招諭與麻葉甕俱未朝貢

陀洹

陀洹一曰耨陀洹在占城西南海中自交州行九十日乃至王姓察失利名婆那國無蠶桑有稻麥麻豆畜有



白象牛羊猪俗喜樓居謂為干欄以白氎朝霞布為衣

南毗

南毗國在大海之西南自三佛齊便風月餘可至國多風王出先期遣兵百餘人持水灑地以防颶風播揚精飲食鼎以百計日一易之俗喜戰鬪習刀稍善射鑿白銀為錢土產真珠諸色番布其國最遠番舶罕利

蘇門答刺

蘇門答刺在滿刺加之西或言即漢條枝唐波斯大食

二國地與花面國相接俗頗淳地瘠無麥有禾一歲二稔所產瑪瑙水晶沈速香胡椒蘇木之屬四方商賈輻輳其氣候朝如夏暮如秋夏有瘴氣明太祖洪武中國王遣使奉金葉表入貢成祖永樂中其王與花面王戰中矢死子弱不能復讐其妻號於衆曰能復此讐者我以為夫共國事有漁翁聞之率衆殺花面王其妻遂從之稱為老王既而王子年長率部衆殺老王而自立老王弟蘇幹刺逃山中連年率衆侵擾王子遣使來訴命

中官鄭和率兵往捕蘇幹刺歸闕下國乃寧王子感

恩貢方物自後朝貢不絕

按明洪武十六年有須文達那國王殊旦麻勒兀達盼遣

使來朝貢馬布兜羅絛等物及薔薇水沈速諸香賜王大統歷錡鈔及使臣襲衣或言須文達那即蘇門答刺明洪武時所更然亦無確據今從明史之例附見於此

### 覽邦

覽邦在西南海中明太祖洪武九年其王遣使奉表來貢永樂宣德中嘗附隣國朝貢其地多沙磧麻麥之外無他種山無峯巒水亦淺濁俗好佛勤祭祀

澹巴

澹巴在西南海中明太祖洪武十年其王遣使上表貢  
方物其國石城瓦屋土衍水清草木暢茂畜產甚夥男  
女勤耕織市有貿易野無寇盜稱樂土焉

百花

百花在西南海中明太祖洪武十一年其王遣使奉金  
葉表貢方物其國中氣候恒燠無霜雪多奇花異卉民  
富饒尚釋教

那孤兒

那孤兒在蘇門答刺之西壤相接地狹止千餘家男子  
皆以墨刺面為花獸形故又名花面國俗淳田足稻禾  
自耕而食無寇盜明永樂中鄭和使其國其酋長常入  
貢方物

黎伐

黎伐在那孤兒之西西接南潑利南大山北大海隸蘇  
門答刺聲音風俗與之同明成祖永樂中常隨使臣入

貢

南澗利

南澗利與蘇門答刺相近明成祖永樂十年附其使臣  
入貢俗撲實地少穀多魚蝦其西北海中有山甚高大  
名帽山西來洋船俱望此山為準宣宗宣德五年使鄭  
和遍賜諸國南利亦與焉

柯枝

柯枝或言即古槃槃國與狼牙修接唐太宗貞觀中槃

槃國再遣使貢方物高宗永徽中獻五色鸚鵡後不復  
聞明成祖永樂元年遣使賫詔撫諭其國九年柯枝王  
可亦里遣使入貢請賜印誥封其國中之山十年遣鄭  
和賫印賜王並撰碑文勒石山上自後間歲入貢其國  
俗頗淳氣候常熱夏多雨田瘠少收諸穀皆產獨無麥

小葛蘭 大葛蘭

小葛蘭與柯枝接小國也明成祖永樂五年遣使附蘇  
門答刺入貢俗淳土薄收穫少仰給榜葛刺奉釋教婚

喪諸禮多與錫蘭山同又有大葛蘭者風俗物產多類

小葛蘭

錫蘭山

錫蘭山或言即古狼牙修明成祖永樂六年鄭和使西洋過其地王發兵劫和塞歸路和攻拔其城生擒王及妻子頭目獻俘於朝釋之命擇其族之賢者詔封為王遂屢入貢宣宗宣德英宗正統天順年間數遣使來貢

欽定續通典卷一百四十八



# 欽定四庫全書

史部

欽定續通典卷一百

四十九  
五十

詳校官監察御史臣曹錫寶

洗馬臣王坦修覆勘

校對官編修臣甘立猷

謄錄監生臣符鼎

欽定四庫全書

欽定續通典卷一百四十九

邊防

邊防西序畧

臣等謹案杜氏邊防典西方凡七十五國惟于闐  
龜茲高昌回鶻諸國名見於宋史至明代于闐尚  
各自為國其餘若樓蘭且末姑墨溫宿諸國自漢  
以後即無聞焉蓋絕域之外互相兼併若唐之突

厥宋之吐蕃明之衛喇特皆曾據有其地也自

聖朝平定西域以來天山南北盡入版圖今第就前史  
所載諸國事蹟之有可考者臚具于篇若夫海外  
之國路隔重洋自明永樂時遣鄭和等屢以金幣  
招徠西洋古里諸國相率踵至其後復有意大里  
亞國人利瑪竇等泛海遠來留居中土始有大西  
洋之稱今亦依次列載焉

正西

沙州

沙州本漢敦煌郡距玉門陽關不遠後魏始置沙州唐因之後沒於吐蕃宋入於西夏元為沙州路明成祖永樂二年酋長昆濟楞敏珠爾率衆來歸命置沙州衛授為指揮使英宗正統中甘肅鎮將任禮收其全部入塞居甘州沙州遂空先是太宗置哈密沙州赤斤罕東西衛於嘉峪關外屏蔽西陲至是沙州先廢而諸衛亦漸不能自立

赤斤蒙古

赤斤蒙古漢敦煌郡地唐屬瓜州廣德後沒於吐蕃宋時為西夏所據元時為瓜州地明成祖永樂二年詔建赤斤蒙古千戶所以塔爾尼為千戶賜誥印尋升衛武宗正德間土魯番犯肅州赤斤當其衝每遭蹂躪乃徙部衆於肅州其城遂空

罕東

罕東在赤斤蒙古南嘉峪關西南漢敦煌郡地明太祖

洪武三十年酋索諾木喇實遣使入貢詔置罕東衛授  
指揮僉事成祖永樂後數入貢武宗正德中土魯番犯  
肅州遂棄城內徙又其部人安扎與種類不相能率其  
衆逃居沙州境部落日繁宣宗宣德七年命其子為指  
揮使憲宗成化中奏請自為一衛朝廷從之置為罕東  
左衛武宗正德十一年土魯番以兵脅之不克自立相  
率內徙

### 安定

安定本名薩里輝和爾東近罕東北通沙州南接西番  
元封宗室布延特穆爾為寧王鎮之明太祖洪武七年  
遣使朝貢改封安定王十年王為其部沙喇所弑王子  
巴咱爾實哩復讐誅沙喇尋又為沙喇部將所殺其衆  
遂衰二十九年復立安定衛授其酋官以安部衆成祖  
永樂間安定王孫雅布達勒來朝自陳家難詔仍令襲  
爵武宗正德時蒙古縱掠隣境安定部衆從此殘亡

阿端

阿端在薩里輝和爾之地明太祖洪武八年置衛後為  
多爾濟巴勒所破其衛遂廢成祖永樂間酋長舒蘇呼  
爾察來朝請復置衛即授為指揮僉事洪熙時察遜酋  
薩奇蘇脅阿端指揮蘇爾丹邀劫朝使蘇爾丹懼而遠  
竄宣宗宣德中赦其子珠扎干復率所部還居本土迄  
英宗正統朝數入貢後不知所終

### 察遜

察遜在肅州西南漢西羌唐吐蕃也元設察遜達蘭元



欽定四庫全書

欽定四庫全書

卷一百四十九

四

帥府明太祖洪武時酋長入貢命設察遜衛官其人為指揮武宗正德七年蒙古酋阿爾托蘇額布勒竄居青海察遜為所蹂躪部族竄徙其衛遂亡

哈瑪爾

哈瑪爾地近甘肅元諸王諤尼實哩居之明太祖洪武十三年濮英請略地開哈瑪爾之路諤尼實哩懼遣使來朝貢時西域來貢者多為哈瑪爾所遏命劉真等討之攻破其城諤尼實哩率家屬遁去二十五年遣使貢

馬驛請罪納之

哈密

哈密東去嘉峪關千餘里漢伊吾廬地唐為伊州五代時號胡盧磧宋入於回紇元末以威武王果哈實哩鎮之尋改為肅王明成祖永樂二年改封其弟恩克特穆爾為忠順王尋設哈密衛以其頭目為指揮千百戶等官英宗正統中其王達斡實哩為衛喇特酋額森所脅服武宗正德時土魯番奪哈密據之屢入寇世宗嘉靖

中依廷議置哈密不問而其地遂為土魯番所有迄穆

宗隆慶後猶有入貢者然非忠順王苗裔矣

按元史諸王表不載

果哈實哩封王事明成祖實錄載李至剛等議奏恩克特穆爾之兄果哈實哩初封威武王改封肅王其弟應

仍襲王爵並見西域傳

土魯番

土魯番即古高昌唐太宗貞觀中以其地為西州元宗時陷沒乃復為國其地頗有回鶻居之故亦謂之西州回鶻宋太祖建隆三年西州回鶻阿多等四十二人以

方物來貢乾德三年西州回鶻遣僧法淵獻佛牙琉璃  
器琥珀蓋太宗太平興國六年其王始稱西州外生師  
子王阿爾薩蘭汗遣都督蘇默昆來貢太宗遣供奉官  
王延德等使高昌及還敘其行程具詳宋史元太祖平  
西域置達嚕噶齊監治之明初號土魯番成祖永樂十  
三年吏部員外郎陳誠使西域土魯番遣使隨入貢授  
都督都指揮等官仁宗洪熙元年其酋音濟徹爾復率  
部落來朝宣宗宣德三年其子復來朝初其地介諸部

間甚微弱後火州柳城皆為所併國日強西域頗為擾  
然自成化迄萬厯朝貢不絕

火州

火州地多山青紅若火故名地宜五穀畜產明成祖永  
樂中其酋長遣使朝貢

柳城

柳城與火州密邇土宜糴麥豆麻有小葡萄甘而無核  
名瑣瑣葡萄氣候常和男子椎結其語音類輝和爾明

成祖永樂中常遣使入貢凡中朝遣使及其酋長入貢多與火州及土魯番偕後土魯番強柳城及火州並為所滅

衛喇特

衛喇特蒙古部落也在韃靼之西土魯番之北元亡其強臣蒙克特穆爾據之後其衆分而為三其渠曰瑪哈穆特曰太平曰巴圖博囉而瑪哈穆特尤雄於部內數與韃靼酋長阿魯台相讐明成祖永樂時阿魯台既受

封為和寧王。瑪哈穆特等亦內附。乃封瑪哈穆特為順寧王。太平為賢義王。巴圖博囉為安樂王。賜以印誥。自是歲一入貢。後衛喇特漸驕。擁兵將入犯。帝乃親征。破其衆於和拉和實。袞迨至圖拉河而還。瑪哈穆特復修貢職。其子托歡嗣封順寧王。於宣宗宣德年間。襲殺阿嚕台。欲自稱汗。而衆不附。乃求元後托克托布哈立之。自為丞相。居漠北。凡蒙古諸部俱屬焉。托歡死。額森嗣。稱太師。衆益強。托克托布哈不能制。英宗正統時。額森

脅諸番大舉入寇明師覆於土木既而額森弑其主自立以其次子為太師東自烏梁海西至赤斤哈密皆受約束額森入貢自稱田盛大汗帝詔稱為衛喇特汗景帝景泰中阿拉知院攻額森殺之額森諸子退歸衛喇特不復雜居漠北世宗嘉靖以後為哈密土魯番所隔其承襲代次無可考

龜茲

龜茲其土宜麻麥秔稻葡萄出黃金善歌樂喜浮圖法



唐置安西都護府武后時言事者請棄之不許宋自仁  
宗天聖至景祐入貢者五最後賜以佛經一藏神宗熙  
寧哲宗紹聖間屢遣使入貢其國主自稱師子王或稱  
西州龜茲或稱龜茲回鶻

于闐

于闐自唐安史亂後不復通中國晉高祖天福中其王  
李聖天遣使來貢高祖遣供奉官張匡鄴持節冊為大  
寶于闐國王宋太祖建隆二年聖天遣使貢圭一以玉

為柙其使言國城東有白玉河西有綠玉河次西有烏  
玉河源出崑崙山每歲秋國人取玉於河謂之撈玉後  
朝貢屢至遼聖宗統和開泰間俱入貢金時遣瑪拉噶  
薩木丹等貢玉璞明成祖永樂間屢遣使入貢神宗萬  
厯時亦間入貢西域諸國蔥嶺以南撒瑪爾罕最大其  
北則于闐最大桑麻禾黍宛然中土行賈諸番能致富  
庶

吐渾

吐渾本號吐谷渾

案遼史太宗本紀稱來貢者有吐谷渾吐渾百官志北面屬國官有吐谷

渾國王府吐渾國王府然五代史傳內所稱吐渾白冰福事即遼史吐谷渾事蓋本為一國故傳首云吐渾本

號吐谷渾今從之

或曰乞伏乾歸之苗裔唐肅宗至德中為吐

蕃所攻部族分散其內附者唐處之河西其大姓有慕

容拓跋赫連等族懿宗咸通時赫連鐸拜大同軍節度

使為晉王所破後唐莊宗同光時有白承福者依中山

北石門為柵莊宗為置寧朔奉化兩府以承福為都督

賜姓名為李紹魯晉高祖立割雁門以北入於契丹於

是吐渾為契丹役屬苦其苛暴安重榮鎮成德有異志  
陰遣人招吐渾入塞承福自五臺山入處中國契丹大  
怒遣使者責誚高祖高祖遣供奉官張澄率兵搜索忻  
代等州山谷中驅出之然晉亦苦契丹思得吐渾為緩  
急之用陰遣劉知遠鎮太原慰撫之後出帝與契丹絕  
盟拜承福大同軍節度使契丹與晉相距於河承福以  
兵從出帝禦之是歲大熱吐渾多疾死乃遣承福歸劉  
知遠侵之承福謀出塞知遠殺承福及其大姓獲牛馬

欽定四庫全書

欽定四庫全書

卷一百四十九

十

貨財鉅萬計其餘衆以別部王義宗主之遼太祖天贊三年攻拔其城自天顯至聖宗統和歲通貢興宗重熙時以吐渾多鬻馬於夏詔沿邊塞防之自後無聞

党項

党項西羌別種或曰即古析支也地三千餘里有棟宇不耕稼地寒五月草生八月霜降無文字候草木記歲唐太宗貞觀至高宗上元間其國人內附散居西北邊憲宗元和以後頗相率為盜武宗會昌初武宗置三使

以統之在邠寧廊延者為一使在鹽夏長澤者為一使  
在靈武麟勝者為一使自後唐莊宗同光以後大姓之  
疆者各自來朝貢宋太祖建隆二年圖默勒來朝授為  
代州刺史開寶元年首領屈遇率十二部歸順嗣是相  
率來貢遼太祖神冊元年太祖親征党項等部平之二  
年党項來貢自後叛服不常

### 大食

大食自唐元宗開元初遣使來貢其南有都盤等六國

天寶六載皆遣使入朝並封為王宋太祖乾德四年僧  
行勤游西域因賜王書以招懷之開寶元年遣使來朝  
貢後屢貢方物遼太祖天贊三年來貢聖宗時遣使進  
象及方物為其子察克請婚以王子班郎君胡思聖女  
嚙老為公主嫁之

拂菻

拂菻或言即古大秦國也東南與波斯接其俗無瓦擣  
白石為末塗屋上其堅密光潤如玉石唐太宗貞觀時

遣使獻方物後大食強盛拂菻每歲輸金帛屬之元宗  
開元時復來朝貢宋神宗元豐四年其王遣大首領來  
獻鞍馬刀劒真珠哲宗元祐六年其使兩至元末其國  
人尼古爾入市中國及明太祖洪武四年太祖召見命  
齎詔書還諭其主復命使臣布拉等齎敕書綵幣招諭  
之乃遣使入貢後不復至

### 波斯

波斯地近拂菻氣常酷熱人知耕種畜牧產珊瑚唐高



宗龍朔間以疾陵城為波斯都督府拜其王為都督俄  
為大食所破其國漸微元宗開元天寶間遣使者十輩  
獻瑪瑙杯等物遼太祖天贊二年來貢

撒瑪爾罕

撒瑪爾罕或云即漢罽賓隋為漕國唐復名罽賓高宗  
顯慶三年以其地為修鮮都督府中宗神龍初即拜其  
王督諸軍事元宗開元七年遣使獻天文書及秘方奇  
藥後其王以年老請以子布琳哲伯嗣許之天寶四載

復冊其子本布準襲王肅宗乾元初使者入貢元太祖  
平西域盡以諸王駙馬為之君長易前代國名以蒙古  
語遂名闕賓為撒瑪爾罕元末為之主者駙馬特穆爾  
也明太祖洪武中太祖欲通西域屢遣使招諭而遐方  
君長未有至者二十年撒瑪爾罕王特穆爾首遣回回  
瑪拉噶富實等來朝貢自是頻歲貢馬駝成祖永樂迄  
神宗萬厯或比年或間歲或三年輒入貢皆有賞給其  
國東西三千餘里地寬平土壤膏腴王所居城廣十餘

里民居稠密西南諸番之貨皆聚於此號為富饒俗禁酒人物秀美工巧過於哈喇而風俗土產多與之同

哈魯

布達實克附

哈魯近撒瑪爾罕世為婚姻其地山川草木禽獸多黑明宣宗宣德七年始遣使來朝貢方物景帝景泰四年偕隣境三十一部來貢馬駝及玉石等物憲宗成化十九年與沙喇思撒瑪爾罕來貢又有布達實克景泰間嘗入貢至是亦遣使與哈魯偕至

達爾瑪

達爾瑪服屬撒瑪爾罕地不滿百里人不滿萬家無城郭上下皆居板屋刑止箠撲明成祖永樂中遣使朝貢賜文綺茶藥諸物

實喇哈雅

實喇哈雅西去撒瑪爾罕五百餘里城居小岡上西北臨河南近山西有大沙洲地生臭草高尺許枝葉如葢煮其液成膏即阿魏也又有小草叢生秋深露凝食之

如蜜煮為糖番名達郎古賓明成祖永樂間李達陳誠使其地其酋即遣使奉貢宣宗宣德七年命中官李貴齎敕諭其酋賜金織文綺綵幣

塔什罕

塔什罕西去撒瑪爾罕七百餘里多園林饒果木土宜五穀民居稠密明李達陳誠李貴先後奉使至焉

薩蘭

薩蘭西去撒瑪爾罕千餘里在塔什罕之東有城郭四

面平曠居人繁庶五穀茂植亦饒果木元太祖時都元  
帥薛塔喇海從征薩蘭諸國以礮立功即此地也明李  
達陳誠李貴之徒亦齎物賜之

克實

克實在撒瑪爾罕西南城周十餘里四面水田東南近  
山中有園林頗宏麗元特穆爾駙馬居也又西三百里  
大山屹立中有石峽出峽口有石門色似鐵路通東西  
番人號為鐵門關設兵守之元太祖駐此遇一角獸能

人言以問耶律楚材對曰此瑞獸名角端能言四方語  
好生惡殺帝為班師蓋其地近東印度矣

特爾默

特爾默在撒瑪爾罕西南去哈喇二千餘里有新舊二  
城相去十餘里其酋長居新城居民僅數百家畜牧蕃  
息明李達陳誠嘗使其地

布哈爾

布哈爾在撒瑪爾罕西七百里節序常溫宜五穀桑麻

多絲綿布帛亦饒六畜明成祖永樂十三年陳誠自西域還所經哈喇等凡十七國悉詳其山川人物風俗為使西域記以獻宣宗宣德七年命李達撫諭西域布哈爾皆與焉

### 養夷

養夷在撒瑪爾罕薩蘭及伊里巴拉蒙古諸部落間數相侵掠無寧居以故人民亡散止戍卒百餘人居孤城明成祖永樂間陳誠至其地



沙喇斯

沙喇斯近撒瑪爾罕明成祖永樂中遣使偕哈喇等八國入貢命李達等偕其使往勞之自後每偕他國來悉與厚賜至世宗嘉靖三年與旁近三十部俱至從使者所乞量與蟒衣膝襪磁器布帛

納蘇察罕

納蘇察罕東去沙喇斯數日程皆舟行城東平原饒水草宜畜牧馬有數種小者高不過三尺俗重僧所至必

供飲食然好氣健鬪明成祖永樂中嘗遣使朝貢

哈喇

哈喇一名黑魯在撒瑪爾罕西南去嘉峪關絕遠其國  
在西域最強大王所居城方十餘里壘石為屋平方若  
高臺虛敞數十間牕牖門扉繪以金碧地鋪氍毹不祭  
祖宗鬼神惟重拜天之禮俗尚侈靡土產白鹽金銀銅  
鐵之屬多有蠶善為紃綺果木穀獸甚繁元駙馬特穆  
爾既君撒瑪爾罕又遣其子薩哈勒據哈喇明成祖永

樂七年來朝貢因其使臣遣使詔諭之諸國使並至序  
哈喇子首自是貢使常至英宗正統三年仍貢馬及玉  
石其旁溫圖琿等國並隸焉

溫圖琿

溫圖琿西南去哈喇千餘里東北去撒瑪爾罕亦如之  
土產膏腴民物繁庶明自成祖永樂八年至十四年偕  
哈喇通貢

巴達克山

巴達克山在溫圖琿東北城周十餘里地廣無險阻民俗富饒明成祖永樂六年命李達賜其酋敕書綵幣諭以往來通商之意十八年遣使來貢命陳誠郭敬往報之英宗天順時復入貢

愛達罕

愛達罕明成祖永樂十一年與哈喇並貢十四年魯安等使哈喇諸國復便道賜其酋長文綺然地小不能常貢

喀什噶爾

喀什噶爾明成祖永樂六年李達等齎敕招之即奉命  
十一年遣使入朝貢方物宣宗宣德時亦來貢自後貢  
使不常至

伊斯帕罕

伊斯帕罕地近愛達罕明成祖永樂中遣使貢獅豹西  
馬宣宗宣德六年憲宗成化十九年並來貢

呼喇濟

呼喇濟四圍皆山鮮草木水流曲折亦無魚蝦城僅里  
許悉土屋酋所居亦卑陋俗尚佛明成祖永樂十四年  
遣使朝貢命所經地皆禮待孝宗宏治五年其地回回  
布魯完等由海道貢玻璃瑪瑙諸物不納賜道里費遣  
還

奇爾瑪勒

奇爾瑪勒西南傍海東北林莽深密多猛獸毒蟲交易  
用鐵錢明成祖永樂中遣使貢獸皮鳥羽罽褐

白松虎兒

白松虎兒舊名速麻里兒相傳有白虎出松林中不傷人亦不食他獸旬日後不復見國人異之曰此西方白虎所降精也因改國名其地無大山亦鮮林木無毒蟲猛獸之害然物產甚薄明永樂中來貢

敏珠爾

敏珠爾明成祖永樂中來貢其國地廣多高山日中為市諸貨駢集

日落

日落明成祖永樂中遣使來貢孝宗宏治元年復貢使臣奏求紵絲夏布磁器予之

默色爾

默色爾亦名密思兒明成祖永樂中遣使朝貢英宗正統六年復來其地極遠後不復至

都爾蘇

都爾蘇周不百里城近山俗佞佛土宜糴麥產牛羊馬



駝有布縷毛褐明宣宗宣德六年入貢勞賜之以地小不能常貢

薩哈勒

薩哈勒山川環抱饒畜產人性淳直恥鬪好佛明成祖永樂中遣使七十七人來貢

羅密

羅密去中國絕遠明世宗嘉靖三年遣使入貢二十二年復偕天方諸國貢良馬及方物二十七年三十三年

並入貢

坤城

坤城西域回回之種明宣宗宣德五年使臣來朝貢馬  
駝後常貢

阿蘇

阿蘇與天方相近幅員甚廣城倚山面川南流入海寒  
暄適中俗敬佛畏神好施惡鬪明成祖永樂中其酋遣  
使貢馬及方物宴賚如制以地遠不能常貢英宗天順

七年命都指揮白金等使其國

天方

天方古筠冲地亦名天堂又曰默伽四時皆春土沃稻  
饒男子削髮以布纏頭婦人編髮盤頭相傳回回設教  
之祖曰瑪哈穆特者首於此地行教死即葬焉墓頂常  
有光後人遵其教不衰有禮拜寺寺分四方其層次高  
下如塔狀每見月初生其王及臣民咸拜天號呼稱揚  
以為禮明宣宗宣德七年國王遣臣沙璫貢方物世宗

嘉靖間偕撒瑪爾罕土魯番諸國貢馬及方物後五六年一貢迄神宗萬厯中不絕

默德訥

默德訥回回祖國也地近天方有城池宮室田園市肆俗重殺不食豕肉常以白布纏頭相傳其初國王瑪哈默特生而神靈臣服西域諸國諸國尊為派罕帕爾猶華言天使也明宣宗宣德間其酋長遣使偕天方使臣來貢

榜葛刺

榜葛刺為五印度之一唐時有五天竺又名五印度高  
宗乾封二年五天竺並來朝元宗開元時中天竺遣使  
三至南天竺一至獻五色能言鳥北天竺一至周太祖  
廣順三年西天竺僧薩滿多等十六族來貢名馬宋太  
祖乾德二年滄州僧道圓自西域還太祖召問所歷風  
俗山川道里一一能記開寶後天竺僧持梵夾來獻者  
不絕榜葛刺者即東印度也明成祖永樂中遣使朝貢

英宗正統三年又表貢其國地大物阜聚貨通商繁華  
類中國四時氣候常如夏土沃一歲二稔俗淳龐有文  
字男女勤於耕織其王敬天朝拜迎詔其貢物亦繁

沼納撲兒

沼納撲兒在榜葛刺西或言即中印度古所稱佛國也  
明成祖永樂十年遣使者齎敕撫諭其國賜王額布勒  
金絨錦金織文綺綵帛等物十八年又敕諭賜之綵幣  
然其王以去中國絕遠朝貢不至又有迪里國近沼納

樸兒永樂十年遣使招諭賜賚之

祖法兒

祖法兒東南大海西北重山天時常若八九月五穀蔬  
果諸畜咸備人體頗碩俗尚回回教多建禮拜寺土產  
馬駝乳香沈香等物明成祖永樂中遣使朝貢宣德中  
又至

木骨都束

木骨都束明成祖永樂十四年遣使與不刺哇麻林諸

國奉表朝貢命鄭和齎敕及幣往報之二十一年貢使  
又至宣宗宣德五年和復往頒詔諭其國濱海地曠磽  
瘠少收歲常旱不產木亦如忽魯謨斯疊石為屋及用  
魚腊以飼牛羊馬駝云

不刺哇

不刺哇與木骨都束接壤明成祖永樂十四年至二十  
一年凡四入貢並與木骨都束偕鄭和亦兩使其國傍  
海而居地廣斥鹵不可耕專捕魚為食少草木亦疊石



為屋以居

竹步

竹步亦與木骨都束接壤風土畧同明成祖永樂中嘗

入貢

阿丹

阿丹在古里之西明成祖永樂中遣使奉表貢方物凡四至宣宗宣德五年命鄭和齎敕宣諭八年復入貢或言唐高宗永徽年間有丹丹國貢方物即其地也

刺撒

刺撒明成祖永樂十四年遣使來貢命鄭和報之凡三貢皆與阿丹不刺哇諸國偕後不復至其國傍海氣候常熱田瘠少收風俗悉與竹步諸國同

麻林

麻林去中國極遠明成祖永樂十三年遣使與諸番貢麒麟天馬神鹿等物帝御奉天門受之十四年又貢方物

忽魯謨斯

忽魯謨斯西洋大國也在古里西北明成祖永樂十二年遣陪臣奉金葉表貢馬及方物自是凡四貢鄭和亦再使至其國宣宗宣德八年貢使至英宗正統元年附瓜哇舟還國嗣後遂絕其國居西海之極有霜無雪多露少雨土瘠寡穀麥人多白皙豐偉屢肆百物具備惟禁酒牛羊馬駝皆噉魚脂不產草木疊石為屋有三四層者

溜山

溜山明成祖永樂十四年其王遣使來貢自後三貢並與忽魯謨斯諸國偕宣宗宣德五年鄭和使其國後不復至其國居海中倚山聚居氣候常熱土薄穀少婚喪諸禮多類忽魯謨斯又有國曰比刺曰孫刺鄭和亦常齎敕往以去中華絕遠貢使不至

南巫里

南巫里明成祖永樂九年遣使與急蘭丹加異勒諸國

偕來貢物十四年再貢

加異勒

加異勒明成祖永樂九年其酋長葛卜者麻遣使奉表貢方物賜宴及幣鈔鄭和再使其國後凡三入貢宣宗宣德八年又偕阿丹等十一國來貢

甘巴里

甘巴里明成祖永樂十二年遣使來朝貢方物十九年再貢遣鄭和報之宣宗宣德八年其王兜哇刺札遣使

來貢英宗正統元年附瓜哇舟還國

急蘭丹

急蘭丹明成祖永樂九年其王遣使朝貢十二年命鄭和齎敕獎之

沙里灣泥

沙里灣泥明成祖永樂十四年遣使來獻方物命鄭和齎幣賜之

千里達 失刺比

千里達失刺比明成祖永樂十六年並遣使來朝貢方物其使俱賜之冠帶綵幣其王有加賜

古里班卒

古里班卒明成祖永樂中嘗入貢其土瘠穀少物產亦薄

刺泥

刺泥明成祖永樂元年其國中回回哈只馬哈等來貢方物其外若夏刺比若奇刺泥若窟察泥若捨刺齊若

彭加那若八可意若烏沙刺踢若坎巴若呵哇若打回  
永樂中俱嘗遣使朝貢其風土物產無可稽

白葛達 黑葛達

白葛達明宣宗宣德元年遣使入貢其使臣言遭風破  
舟貢物盡失乞恩貸之賜之冠帶俾歸見國主庶幾免  
責許之使附隣國貢舟還國宴賜悉如禮其國土地瘠  
薄宗釋教又有黑葛達亦以宣德時來貢國小民貧尚  
佛畏刑二國俱以鐵鑄錢



西洋古里

西洋古里地最大與僧迦密邇西洋諸番之會也去中國甚遠西瀕大海其人淳厚行者讓道路不拾遺喜事浮屠半崇回教富家多植椰子樹至數千其他蔬果畜產多類中國明成祖永樂時遣使朝貢賜印誥及文綺是時諸番使臣充斥於庭以古里大國特序其使者於首嗣是屢偕諸國入貢

西洋瑣里

瑣里附

西洋瑣里明太祖洪武二年命使臣劉叔勉以即位詔諭其國三年平定沙漠復遣使臣頒詔其王別里提遣使奉金葉表獻方物賜文綺紗羅諸物甚厚成祖永樂中復遣使偕古里阿丹等十五國來貢土產胡椒附載與民市又有瑣里國近西洋瑣里而差小洪武三年命使臣齎詔撫諭其國五年王卜納的遣使朝貢並獻其國土地山川圖

意大利亞

意大利亞國居大西洋中自古不通中國明神宗萬曆時其國人利瑪竇至京師為萬國全圖言天下有五大洲其說荒渺莫考利瑪竇至中官馬堂以其方物進獻帝嘉其遠來假館授餐給賜優厚利瑪竇遂留不去其人奉天主耶穌教自是充斥中土好異者咸尚之其所言風俗物產亦多夸大不足具述

西北

伊里巴拉

伊里巴拉在肅州西北三千餘里地極寒深山窮谷六月亦飛雪或曰即古焉耆或曰即古龜茲元名其地為伯實巴里世祖設宣慰司尋改為帥府其後以諸王鎮之明太祖洪武二十四年國王哈達拉和卓遣使貢馬賜其王綵幣十表裏其使者皆有賜成祖永樂四年貢璞玉十六年布色弒其從兄王諾果沙扎該自立為王徙其部落西去更號伊里巴拉宣宗宣德後屢入貢

### 準布

準布不詳其始遼時歲來朝貢聖宗常置準布等部節度使天祚時尚來貢

突厥

突厥唐末為諸部所侵部族散微五代之際常來朝貢遼時朝貢無常有事則助軍號屬國軍

回鶻

回鶻

即杜典  
回紇

匈奴之別裔本名回紇唐憲宗元和中訛

為回鶻五代時常來朝貢宋太祖建隆二年景瓊汗遣

使朝獻後屢貢方物徽宗宣和中因入貢散而之陝西  
諸州貿易留久不歸朝廷恐其為邊害詔禁止之遼太  
祖天顯十二年九月回鶻遣使來貢十月遣使賀永寧  
節太宗會同四年特賜旌旗弓劍衣馬七年回鶻遣使  
請婚不許

黠戛斯

黠戛斯

即杜典  
結骨

古堅昆國亦曰居勿其君曰阿熱遂姓

阿熱氏駐牙青山唐肅宗乾元中為回紇所破其部衆

漸微至遼嘗遣使入貢

沙陀

沙陀有大磧名沙陀故以為號其衆趨悍善鬪唐時號沙陀軍遼太祖神冊元年討降之

欽定續通典卷一百四十九

欽定四庫全書

欽定續通典卷一百五十

邊防

邊防北序畧

臣等謹按杜氏邊防典北方凡四十一部其見於新舊唐書者惟契丹奚室韋鐵勒數部而已蓋塞北之地多逐水草而居自古稱為行國故其疆域之分併於考證較難大約漢之匈奴及烏桓鮮卑至元魏為蠕蠕隋



唐為突厥唐末為契丹而其餘諸國則皆其所屬之  
小部落也宋史外國傳止載東西南三方明史於北邊  
亦但有韃靼一傳蓋遼之得國本先於宋迤北之地皆  
非宋有元則起自沙漠撫定中原逮明有天下而元  
之後裔仍據有漠北終明之世不相統屬今仍明史  
之名錄而載之間亦採遼金時入貢諸部列著於篇

正北

韃靼

韃靼即蒙古故元後也明初元順帝殂於應昌其子阿  
裕實哩達喇嗣立徙於和寧傳其次子特古斯特穆爾  
駐捕魚兒海於太祖洪武二十一年為明將藍玉所敗  
走至圖拉河為其下伊蘇岱爾所弑部落多潰其族諤  
尼實哩收散亡居和寧之西復為明都督劉真等所破  
自特古斯特穆爾後五傳至衮特穆爾皆被殺遠族果  
勒齊篡位稱汗始去國號稱韃靼其下以非順帝裔不  
附酋長阿魯台等殺果勒齊而迎元後布尼雅實哩立

以為汗成祖永樂六年以書諭之不報命淇國公邱福  
統五將軍出塞擊之師殲焉八年帝親征布尼雅實哩  
懼欲與阿嚕台俱西阿嚕台不從君臣始各自為部布  
尼雅實哩西奔明師追敗之於鄂嫩河還師遇阿嚕台  
復破之十年布尼雅實哩為衛喇特瑪哈穆特所殺時  
阿嚕台強盛數與衛喇特相攻元裔益微其後阿嚕台  
為衛喇特所感內附封為和寧王仁宗洪熙時阿嚕台  
數敗於衛喇特乃率其屬東走烏梁海駐牧遼塞宣宗

宣德中阿嚕台為元裔托克托布哈所襲孽畜畧盡未  
幾為衛喇特瑪哈穆特之子托歡所殺而立托克托布  
哈為汗以阿嚕台之衆屬之托歡自為丞相托歡之子  
額森嗣益桀驁自雄托克托布哈不能制後疑其主托  
克托布哈與中國通攻殺之額森自為汗尋亦為其下  
所殺部中共立托克托布哈之子號小王子是時韃靼  
諸部多互相雄長其後元裔數傳至博齊嗣為小王子  
徙帳東方為察哈爾而諸部之在西北邊者甚衆若濟

農諳達之屬其衆益強時為邊患與明相終始云

朶顏 泰寧 福餘

朶顏泰寧福餘

即杜典庫莫奚

其地為烏梁海唐時號渾莫奚

後服屬契丹元為大寧路北境明太祖洪武初相率內附遂置大寧都司營州諸衛封皇子權為寧王鎮焉數為韃靼所抄二十二年詔以烏梁海之地置三衛指揮使司各領其衆以為聲援自大寧前抵喜峯口近宣府曰朶顏自錦義厯廣寧至遼河曰泰寧自黃泥窪踰瀋

陽鐵嶺接開原曰福餘惟朶顏地最險而強成祖從  
燕起靖難兵患寧王躡其後因厚賂三衛以說之來  
師行寧王餞諸郊三衛一呼盡起西擁寧王入關從  
戰有功成祖既立徙寧王南昌徙都司於保定而盡  
割大寧地畀三衛以償前勞英宗正統以後竄處迤  
北與衛喇特時出擾邊朝廷命將擊破之其後叛服  
不常

### 鬼國

鬼國元世祖至元十七年三月詔討之命以蒙古軍及  
哈喇章軍西州約羅萬嘉努軍阿爾哈雅軍數道並進  
尋復招諭之至九月其國主阿恰降自後叛服不常

珠巴克

珠巴克遼太宗天顯十二年來貢至聖宗開泰時諸部  
皆叛興宗重熙時復來貢又有迪里五國遼時皆來貢

烏爾古

烏爾古為遼太祖所征服太宗天顯時來貢穆宗應歷

子歷牛蹄國以北行一年經四十三城居人多以木皮  
為屋其語言無譯者不知其國山川部族名號其地氣  
遇平地則溫 and 山林則寒冽至三十三城得一人能鐵  
甸語其言頗可解云地名額利烏于邪堰自此以北曠  
阻不能達其人乃還此北荒之極也

鐵甸

鐵甸在契丹東其族野居皮帳而人剛勇地少草木水  
鹹濁色澄久而後可飲



十五年烏爾古叛掠居民財物遣林牙蕭斡討之聖宗  
統和以後叛服不一後服屬於金

契丹附近諸國

契丹在隋唐之世已載杜典其後  
事跡備詳遼史茲取胡嶠所記錄

其附近諸  
國部落

契丹西北至烏庫哩其人長大最勇隣國不敢侵又其  
西嘉噶爾又其北單于突厥又北黑車子又北牛蹄突  
厥其地尤寒又北狗國手搏猛獸語類犬吠契丹嘗選  
良馬二十匹遣十人齎糧北行窮其所見其人自黑車

助兵攻契丹遼太祖建國攻渤海拔呼爾罕城俘其王大諲譔以為東丹王國立太子托雲為人皇王以主之神冊四年葺遼陽故城以渤海漢戶建東平郡為防禦州天顯三年遷東丹國民居之

哈斯罕

哈斯罕遼聖宗開泰元年其王哈爾吉來朝八年其特哩亥額布根宰相薩喇來貢後屢遣使入貢太平五年乞建旂鼓許之天祚時東面行軍副統瑪格等攻之敗

東北

渤海

渤海本號靺鞨其貴族姓大氏唐武后時高麗別種大祚榮有衆四十萬人據挹婁臣於唐至中宗時置呼爾罕州以祚榮為都督封渤海郡王其後世遂號渤海梁太祖開平元年國王大諱諤遣使者來訖周世宗顯德常來朝貢宋太祖太平興國四年其酋帥大鸞河率小校李勛等十六人部族二百騎來降六年賜渤海王詔

績哈斯罕始與遼絕後服屬於金

富珠哩

富珠哩遼聖宗統和二十二年偕烏舍等部來貢開泰七年三月命歲貢貂皮興宗重熙十七年耶律義先等伐富珠哩酋托多羅十八年二月執托多羅以獻始與遼絕

烏舍

烏舍遼聖宗統和十三年七月以兵侵鐵驪遣奚王和

碩鴈等討之十月烏舍歸款詔諭之十四年烏舍烏哲圖以北遠乞歲時免進鷹馬貂皮詔生辰正旦貢如舊天祚時不復至金太祖時烏舍楚古爾蘇來降

鐵驪

鐵驪其人雜處山林無君長遼太祖天顯元年鐵驪來貢聖宗開泰元年鐵驪納蘇等送烏舍百餘戶至賓州賜絲絹乞賜佛像儒書詔賜護國仁王佛像一易詩書春秋禮記各一部興宗重熙十六年鐵驪實勤們來朝

以始入貢加右監門衛大將軍自是無歲不貢天祚帝  
乾統時鐵驪貢遂絕金太祖時鐵驪王和哩布以所部  
降

博囉滿達


博囉滿達在遼時與鐵驪烏舍富珠哩哈斯罕等皆為  
屬國軍聖宗太平五年以博囉滿達部多烏舍戶詔索  
之七年遣使來貢後入貢不絕興宗重熙十年詔其部  
歸哈斯罕戶之没入者使復業

定安

定安本馬韓之種為契丹所破其酋帥糾合餘衆保於西鄙自稱定安國宋太祖開寶三年遣使朝貢太宗太平興國中太宗方經營遠畧詔其國令張特角之勢其國亦欲倚王師以抒宿忿表末云必欲報敵不敢違命乃答以詔書令發兵同伐契丹端拱中獻方物淳化中上表後不復聞

室韋

室韋契丹別種散處川谷逐水草其言語則靺鞨也其部族不一唐時皆入貢遼太祖時黑車子室韋以八部降尋復叛討破之太宗會同元年嘗進白鹿又貢名馬穆宗應歷十五年黃室韋與大黃室韋小黃室韋俱叛聖宗統和以後復降順





欽定續通典卷一百五十